

愧

瘠

集

愧瘖集卷之八

莆田二山野人林大輅稿

五言排律

得家書三十二韻

遠天逢候鴈新歲曳華裾赤日金門迥清江水
驛紆一封看數字半歲得三書老欲拋貧病閒
應任卷舒林棲籠慧鳥湖隱網文魚鄭谷存三
徑何塘漏百渠他年分菽麥勝地奏瓊琚芳樹
含晴靄烏山動碧虛觴攜賓從後歌發笑言餘

洪景薰蘭畹幽懷寄草廬安身論混沌涉世謝
吹噓客歲隨羈旅燕臺稍寓居勤勤三釜養僕
僕兩肩輿真率翻成僻過逢漫得譽風霜兒女
戀桑梓語音疎歸日懸庭訓營魂夢里間嚴翁
欣出戶慈母悵縫袪不謂睽離久如聞謦欬初
燕安頻問客雀躍更狂予小子分微祿兒童評
小車鯉湖仙侶飯龍洞野人蔬種樹煙霞塢看
花伯仲醪那能隨俛仰奚論獨躊躇醉裏歌巾
幘閒中避隼旟心田輝道氣壽域盎春墟粵使

歌梅管曹郎念雨畚關心聞鏤鑠寄語慎居謹
仲米負難並狄雲望不如勞生同蹴鞠習靜笑
蘧藤京國春相慶妻孥意共攄小庭喧博采華
燭爛巡除穆穆身頻健星星髮任梳瓊丹成九
轉分樂及樵漁

獄中不寐呈黃伯固陸汝亨夏于中二首
傳呼催永漏不寐待初曦稍釋全身想翻慚報
主私啼猿迷霧峽宿鳥失風枝孟博心偏壯鄒
陽病敢辭昔人同蹇縮吾黨竟支離隔幔遊仙

枕涪翁繫我思

詔獄盈霜雪陰房肅鬼神誰能期不入聊復夢
相親械繫宵聲寂慈悲曙色春壯懷應束縛衰
態更逡巡自語蛩依砌獨明月照塵東曹數君
子共念卜商貧

葉鳴玉水部分司宴集

病客秋深榻孤舟濟上津水曹書屢至地主意
相親乍見翻憐我衰容欲避人談鄉能款曲涉
世更逡巡誼重同袍日懽深舊國春檣烏晴度

柳庭雀晚栖筠把酒曾辭醉彈棋卻任真江湖
多逆旅飄泊有孤臣憶在燕京日蚤充觀國賓
路長驚驥足劒老拂龍鱗流落身如寄艱虞氣
益淳名浮羈歲月迹遠混冠紳南北浮槎在風
烟病髮新鑾輿遊薊趙虎帳握絲綸衛水環千
幕靈山拱百神南征誇聖武萬象囿皇仁賤子
移官志清時報主身蹉跎萍梗迹偃蹇雪霜辰
燈火分司共歌筵異味陳屈平終慕楚仲子亦
悲秦栗里思餐菊吳門尙憶尊前脩俱落落落吾

懷素集 卷八
黨漫恂恂別濶懷難盡交深德有鄰道情增繾
綣世業懼沉淪屏裔吾何愠懷賢爾自珍故鄉
聞信息吏道悅清貧伊欲浮滄海翻驚隔紫宸
莫言明發別涕淚一沾巾

行路

行路歲時晚移舟夢寐驚星河流夜色鼓角振
秋聲魚札懷千里狐裘坐永更野寒漁火聚津
遠戍樓橫郡邑憂芻餉公卿賀太平南征無信
息衛水亞夫營

廣文王子用楊子孟達陳子伯僑張宴于

至喜亭席上即事

鳥鳴綠樹靜燕拂畫梁飛野水浮蒼靄江城隱
翠微傳香驚候客擁箒愧振衣款語薰風細流
杯杲日暉廣文羶不冷遊子意忘歸至喜孤亭
峙前時舊碣稀青原甘護落風浴亦零沂僻性
慚迂劣浮名孰是非升沉應慷慨感遇漫虛歎
與爾開懷抱尊前問釣磯

歐陽子貶夷陵徙至
喜亭自况亭舊在江
澣後移學宮子
復舊峙未遑也

洞中用韻

曾慕南州勝西陵山水奇三遊名洞在半刺左
官宜問路遲玄覽尋真慰素期猿迎雲外杖花
愛客中詩鐘鼓清天籟壺觴絢玉芝麓谿纓可
濯撫石盼蒼漪

顧新山少叅留飲分司奉謝三十韻

放臣行役遠拙宦受知深燕石滑荆璞樗材拙
鄧林三秋愁更急萬里夢相尋星耿曾如晝雲
飛不作霖栖栖雙眼瞥冉冉二毛侵舊業嗟全

廢愚衷喜受箴書囊餘道籙行笥拾人參州小
民多瘠年荒氣轉稜辛勤如子保循省切淵臨
弱志頻懷古清流祇媿今賈生能作賦宓子得
鳴琴峽樹交南楚江舟聚北陵棲山多草屋行
縣或雲岑莽莽露猶泫脩脩竹自森冠裳懷上
國桑梓寄遐音旅舍聞僧梵羈懷入暮砧簿書
分淨篋燈火伴栖禽半剌增多事閒居遁寸心
每因趨走怯轉覺性情禁范轡看初攬張輪仰
久任喜看薇省老頻減越人吟吏道溫如玉賢

聲絢比金清時還繫聖明德更推忱地僻遙瞻
斗官微敢盍簪登堂辭屢獎下榻酒頻斟召伯
留棠樹丈人住漢陰愛多吾獨激澤厚衆尤欽
當日標韓幟他年獻楚珍致身慚賈傳陳力詠
周任明發江陵道別君淚滿襟

長陽道中二首

恍惚尋真路沉冥獨曉行山深留野鹿林僻散
遊鼙絲竹風泉細丹青石草明雲垂崖欲墮苔
滑徑還縈野鳥驚殘角寒花拂遠旌裘凝霜後

冷幘動雨餘清古路蛩聲滿荒橋虎跡橫旅情
遊不極歲晚愧虛名

巾舄忙中過烟霞僻處奇青蘿縈桂子白竹出
松枝雲凍衣偏濕山盤馬自遲寒飈陳落木絕
巖漏晴曦鬼谷何年閉僊踪舊事遺嶺猿喧墜
果邨犬吠過籬坐石憐棋局逢谿憶釣絲客星
隨處照失路未應悲

次鄭憲副速遊韻

勝地何曾遠南津江水潯勞勞懸遠思忽忽報

佳音泛舸還初約扶藜得共臨香風傳細草晴
瀑瀉虛岑準擬山中宿眞憐澤畔吟子眞在鄭
谷良晤豁煩襟

送陳亞卿入蜀採木三十二句

昭代崇宮室玉梁上紫霄美材應百仞孤植已
三朝楚水夷疆外巴山漢節遙搜求還四裔制
轄渺三苗春入靈椿幹霜廻巨栢標十圍寒翠
巘千里渺危橋蔽日除煩苛凌風謝採樵建章
遺物色壯麗侈歌謠使節廻元氣台光照庶寮

勞民思耿耿報國意迢迢湘浦徕酋黠瞿唐魍
魎驕天工應可代神貺未須招日下懸歸佩雲
端定珥貂關都居漢帝冀北壽神堯風土隨時
紀詩章適意調廻舟聞鳳管寂寞慰栖鵲

中丞元山示哭其弟材同給事詩二首謹
用韻哭之因以奉慰

空閨守苦塊號泣嗟旻天屏裔亦臣子清編紀
爾賢遺孤懷抱日猶子杖屨年世有傳經笥家
無負郭田流光分斗壁餘慶耿椿萱三峽廻秋

夢五谿魂黯然

縲紲通家侶荆蠻去國辰同袍文共達吾黨道
相親叢棘麟鳳網頽波風雨津逢辰猶抱璞捐
世祇離塵壠草何年長暮林奕世春乾坤如許
大遺憾有斯人

隆中

諸葛隆中隱當年稱卧龍聲名人不忌儔侶道
相容漢楫迴農里裏堤絡楚封風雲三顧重魚
水一朝逢伐魏先摧壘和吳罷折衡草廬荒舊

塢蘿徑隔新踪二表乾坤節千年伊呂蹤兼葭
芬夕靄松栢秀嚴冬懷往今巾舄離塵舊鼓鐘
聖明崇廟祀檀几紫烟重

習池

攀林非邂逅駐蓋偶襟期曠達誰相訝風流或
在茲亭清襄野日泉瑩習家池朱檻冠纓合華
筵俎豆移藉蘭霞彩綴酌菊月華滋舞席嬌垂
手歌臺婉斂眉神僊環珮侶耆舊薜蘿辭江漢
連三楚峰巒接九疑舟車今樂土歲月舊沉碑

荊棘荒荒路烟波渺渺滿山公騎馬醉還問幽
并兒

南征篇

逾濠稱亂天兵親征之

君王如漢帝薄伐值秋深扈從馳黃閣兵戈發
羽林翠書天上秘鐵騎雨中駸雷電江聲急鯨
鯢海氣沉大都猶鼎沸聖武切冰臨僞檄傳何
遠謳吟望祗今皖城輝壁幟建業散營金平虜
曾持橐安邊獨擁衾監軍初賜劔裨將舊從禽

翠駕低行在華舟蕩潞潯漢官龍虎隊戎樂趙
燕音雪苑西山暮江城南浦陰高文恩自衍吳
楚禍徒淫去國荆門路憂時漢署心長沙能作
賦澤畔欲行吟他日書王畧明庭鼓舜琴孤臣
踪跡遠回首一沾襟

值菴先生政蹟詩

有引

大中丞東吳值菴盛公嘉靖二年春來
撫江右維時屢飢吏治弛縱民俗日澆
公至綱紀百度廉夫黷賂者數燹者武
斷者裁諸法仁以直枉靜以夷囂弘以
濟艱持衆美而序成之興學裕民彰微
振滯日弗遑給江右人士惟恐公弗獲

終惠茲土是歲秋公承

上命晉右司馬往撫兩廣廣之民之幸猶

夫江右也初公弱冠舉進士筮仕負節

謫還方歷邑若郡遷藩臬佐長弘識偉

施昭業日樹若夫兩廣撫綏乃武乃文

國威民命專之矣考衆志而任于公尙有

終譽哉然謂可以盡公之業者非也或

疑公名碩外撫爲淹者亦非也公其弗

有以慰天下之望耶某於公之

行僭有所言用寓懷仰云耳

豪傑分時棟明公舊有聲曹郎開水部奇節挫

權鎔放逐身雖遠艱危氣益平郵官慳斗祿邑

令亦荒城順慶初留駕長沙復遠行勲名仍證

躋俯仰獨崢嶸墨髮期公輔丹心薄世榮外臺

風采峻渙俗歲年更雨露多沾潤雷霆不震驚
資深纔易組望重豈浮名中土觀風近太微徹
夜明旬宣崇兩轄齊陝耀聯珩在宥仁曾布今
終績用成分寰知奠牧阜國即屏京武廟綏全
蜀臺臣召法卿曠懷能采納直道自澄清西極
垂銅柱明庭報彩瓊百年貞亮在浮世毀譽輕
江省初平定疲民出擾攘陳翁曾撫輯鄭老始
經營協道隨寬猛同心恤困惻遽膺廷尉召相
繼駕魚軒夫子來何暮達人道必亨威高羣蠹

歛猷壯百寮貞苦樂關時事安危任國楨謙虛
勤好士冲約益持盈列郡歌鴻鴈方陞淨鼓鉦
民方蘇菜色髮已受霜莖玉璽三台降華繒百
拜迎如何南海節倏動豫章旌聖化元無外物
情頻若醒壺漿諸路集冠蓋一時傾借寇懷徒
切思何意屢呈帆開寒浦濶亭別暮洲晴百粵
雄圖古諸蕃部落縈荆書增舊秩開府重來俘
節鉞炎方重經綸昭代盛嶺雲浮瘴雨柳樹雜
山橙羅館梅先發浯溪水自泓霜清刁斗肅日

射甲光瑩閫外貌貅戍胷中百萬兵今年勞薄
伐隨處失深耕盜賊饑寒起夷獠劫掠并至仁
思匿武更化在安氓墨吏謀多譎淳風政尚宏
激揚須藻鑑師表賴鈞衡召德遵周紀夔和協
帝謨蜚聲期入頌大業定銘鏤賤子非聞道謀
身不計羸髮毛將易素日月已遄征浮食飄踪
跡菲才尙使令玄關窺俗軌世局幻新枰白璧
何由謝瑤琴欲暗捩擊鷹空自戀駑馬愧先鳴
儀範當年得瞻依此地瞪祗悲終弱植敢擬竊

輿評他日登堂夢風烟總繫情

春日寫懷呈邕州守蔣子雲二首

粵客寄邕州月江一鏡浮寒沙低柳幌霽野傍
楓舟鳥語春先報夷歌酒共酬思田猶小醜戌
卒尙遲留敢論兵聲實獨憐路阻脩七旬苗自
格萬國仗皇猷

巨公初領郡歲事入新年小子漸爲客羈懷紀
短編霞觴流紫氣桂醕俯蒼漣元日將迎倦他
鄉夢寐懸行臺滯舟楫野戍莽風煙試向春披

拂何如地主憐

建州呈楊四泉憲伯

寒城傳使幘霜仗叩賓扉瞻玉心逾渴依蘭願
不遑曠懷兼叔度清思邁玄暉鷹隼秋爭擊鳳
麟晚避機栖栖民隱切落落實情微列嶂青如
畫諸谿碧共圍風收炎海瘴春動粵山薇折節
吾何敢包荒世所稀尚平還絆俗蘧老已知非
短日聽談劒浮蹤欲振衣子雲識奇字別去欲
何依

安鄉舟行至澧州雨晴景物互變興懷漫

述一章

雨歇橫遙岑江迴漲遠水撥棹紛鳴笳停車絕
濡軌纜減百夫勞途舒三日累撫化慮徒縈卽
物時猶笑洪流想潛虬細浪看躍鯉嵐浮分褰
帷峰明侵隱几張幙絢雲紈懸旌輝林綺披籍
對俯襟焚香坐移晷不聞榜人喧惟見津吏喜
魍魎何逡巡飛廉獨披靡采采紉湘蘭行行拾
汀芷昨泊已深宵今徂猶百里吊屈誦騷詞感

古悲荒址直延靈脩名匪眩遲暮理黃虞道無
從逢千忠可齒長爲烈士規奚但讒夫耻楚甸
歌載馳澧郡瞻伊邇詢風視田疇覲武嚴戎壘
萬事屬求康鴻休奚泰否

復雨二首

野飯頻過院焚香坐晚曛洗天江雨至流壑石
泉分涼影光原樹繁聲注海雲鶴鳴平蟻垤魚
戲動鷗群珠玉憐飄灑膠絲訝糾紛蛙兼初露
湛苗解夕燐焚憂歲思環艾懷人欲獻芹老僧

愧瘖集

八卷

酌佛力鍾交遠堪聞

栖畝餘糧日遙憐異代情感時驚不雨懷古若
爲情露禱應神助清齋與佛盟頻疑龍臥穩轉
喜燕飛輕宇宙低平野風雷動化城傾河移晝
漏流潦聚谿萍萬象迴元氣諸天慰友生三秋
霖未作江閣獨屏營

故人共酌二首

溪風吹几杖攜客過前村野酌來田父林曦照
瓦盆忽逢城郭使相贈薜蘿言吳質交情舊林

逶迤興繁清傳瓊液注香動碧霞翻泛蟻來花
徑持螯坐竹根山空侵夕翠谷轉逗斜暄不盡
飛觴意遲君到石門

爾自歸東海逢予住碧山交期驚老大世路失
閒關野飯時同飽春壺興不慳索居雲榻靜望
遠鯉書還淑氣浮觚瓚僊瓢隔市寰袁杯朱火
集陶徑白衣扳辟穀疑看鼎逃禪欲閉關乾坤
獨鶴夢歲月狎鷗閒遲客心徒遠憂時鬢漸斑
更看霖雨足相見解塵顏

山中感懷

何意山間月輝輝照薜蘿流年惟我共撫化柰
渠何竹影憐聞笛漏聲憶佩珂獻賦時難遇傳
經髮易皤林栖知鳥倦谷隱覺雲多志憐劉向
苦跡許馬卿過風露溥金氣江湖渺白波滄洲
吾道在遙夜紫芝歌

五言絕句

暮春直省三首

旅夢醒啼鳥晴窓日欲斜還將多病眼閒看續

開花

脉脉驚時序江天鴻鴈來紫雲應戀闕青草望
鄉臺

淡日鳩鳴雨微雲燕受風花疎亭北樹酒濶竹
西筒

屏息四首

屏息吾忘我年華復在茲祗憐白日靜一枕絆
遊絲

午雲低野几旭日澹晴窓古道傳經在應慚黃

次公

高垣闌衆香車馬奔聲迹獄吏近人情清言歡
初夕

俯仰天地寬同袍亦兄弟匣中劍不鳴填海憐
精衛

官陽暮雨五絕句呈外叔黃汝俊從兄朝
居

雨色千崖暝濤聲獨夜寒郵程驚又滯晤語旅
愁寬

山縣緬雲霧江流到市橋六年談契濶一夜鬢
蕭條

草屋俯石瀨桐谿流暮泉隔船漁火亂相對夜
無眠

倦遊未慰意滯客倍思家浙瀝寒聲滿那堪聞
暮笳

吾兄遠問病不見燕京書六月會江路相思雙
淚餘

舟入清湖三日抵江山卽事六首

野日晴沙耿津雲晚樹重
鷓鴣飛不劇漁艇暮相從

遙洲環淨渚高瀨起寒烟
舟子招呼早驚魂倍黯然

歲晚悲岑寂鄉書欲問誰
幽花寒色遠日斷碧山涯

飄泊慚生理妻孥喜共歸
故園松菊徑何日薜蘿衣

古樹盤西澣近邨人語疎
童僕疑雨色移舸買

谿魚

雪意千峰寂湖光萬木寒一尊聊撥悶漁唱杳
前灘

別僧

三宿雲留榻九峰僧閉扉江梅回首白鐘磬出
林微

松滋館書壁二首

出門春意動入楚春花飛別意驚漂泊如何鄉
夢稀

晚江青蕪平野渡撫孤石寒飈沙際鳴浮雲莽
遺跡

偶書

空言徒作祟多技却迷真散帙清齋裏相思愧
古人

遣興

南津雲水白向晚采真遊借艇漁郎笑江深月
影流

宿香緣寺三首

窓外連宵雨鄉山入夢難
淒清學禪坐相對竹枝寒

行蟻廻懸果饑蟲抱細藤
朝來溪雨急門外白雲層

汲溪三淪茗入定老僧忙
欲問玄中業鐘聲到石牀

鄉人自茂州相過因寄以書

蜀道遊天杪荆江度萬雲
家書報踈澗賓館喜逢君

江漢

時乘輿久駐通州獻俘縛黨人心疑懼
亦惟天命有常鸞藥不萌在楚聞之更
紀盛休十章

江漢遙聞信宸遊歸羽林東風吹潞水玉舸紫
雲深

寄興蒼梧遠遨遊玄圃新三山回首望知戀帝
鄉春

逆黨鯨鯢戮江纍泣網羅野人憂瀕洞戎幕戰
功多

陸雲吳下叟黨錮豈尋常從古姜菲恨中郎獨
飲章

六輦駐通城天聲震鉅卿義兒喉舌地猶擁四
家兵

刁斗連宵肅風塵滿地浮淮南思議獄將帥欲
封侯

城郭眇荆棘烟花明遠天五城鐘鼓徹歌舞照
金蓮

朔鴈春江影燕雲日下生簡書悲世故脉脉宦

遊情

洞庭濤百里燕薊雪千山瑤草相思淚龍樓霄
漢間

萬國談戎馬謳歌隔兩年只今吳楚定勒石亦
燕然

紀遊答諸廣文三首

飲澗猿將子栖叢雉護雛篆蟲蟠古蘚黠鼠跳
平蕪

洞霞依竹見巖溜陟丘聞縈靄增春色僊都渺

世芬

山幽橫野榻月淨吸江罇
畫舸南津渡歌聲出
近村

北信驚心微言紀之四首

驛使南來報邇州
今鼎湖飛龍瞻沙漠
風雪黯
清都

萬國收佳氣彤雲歌舞回
瓊宮悲寂寞玉樹早
春催

建業歸黃屋憂勤已損神
北辰幾萬里烟縷靜

風塵

大祀圓丘肅燔柴意未脩半空朝玉馬瀛海逗
東流

畢汝霖水部見訪飲餞雙峰席上紀事八
首

相對梅花飲雙峰鐵笛清深宵無吏況月色動
山城

二月山氣高狐裘足寒色秉燭謀良歡梅花照
人白

山水自真性風塵遑遠裏茅洲他日過遲我共
春杯

昔日衛水上南來送小舟春風忽相見羽服在
丹丘

節物人頻換鶯花歲自新乾坤多事在湖海百
憂頻

薄劣慚民病談荒坐永更春花看未徹相對遠
遊情

草露晴峰濶春星野樹微他鄉談栗里滯客戀

荷衣

五載欲逢君
今宵非邂逅
仰看雄劍光
俯聽清商奏

過篁林宅兆三首

五石淨層巒
蚪龍俯海日
遊子歌蓼莪
歸來淚橫臆

綠巘霜露多
啼鳥在深樹
曠然玄雲期
或與蛟仙遇

篁林穴眠牛
海上青丘小
白鶴歸未歸
夢徹霜

鐘曉

鎮江守林巽峰封君
葬也環墳五石自奇

林西谷招遊黃澹峰壽溪與柯石莊同往

席上十首

微雨來滄洲孤亭俯青壁相看九華翁隔溪吹

玉笛

野樹沙際明春潮島邊小夢裏疑瀟湘滄浪歌

清曉

澹峯與予
同遊于楚

小隱黃山谷餐霞路不迷竭來分野杖芳草午

橋西

看花三十載老去一扁舟萬事清尊滿滄江正

穩流

子與澹峯
同鄉薦

釣石高於岬春來野水多主人疎揖客散髮紫
芝歌

冥冥日沉樹荒荒雲滿岑石門遲下榻留伴獨
栖禽

興遠思盤谷詩清咏輞川他時還獨往留醉白
鷗前

西谷亦林逋方外雲石思白鶴識玄蹤兒童報

詩事

石莊如許清東柯連海色邂逅記同遊却訝華
胥國

野人薜荔衣臥對南山紫悠悠千古懷澹澹壽
溪水

雞峯夜歸十首

小童吹暮角月色滿秋山回首西雲路居人欲
閉關

松風灑遙嶺石磴縈寒蕪衰鬢看俱白杜陵今

野夫

不知山近遠老去一肩輿那復金門夢長卿曾
著書

璇霄霜欲下瑤宇月初寒何處香來滿秋風吹
桂蘭

石羊蹲古隊灌木動悲風誰訝雍門嘆傷情今
古同

驢背五六載看雲不厭多倦遊人共訝長住碧
山阿

仙珮彤霄月蓬山滄海濤只疑塵眼窄獨上嘯
臺高

村孤猶吠犬宵寂促行人西隱吾何病長懸漉
酒巾

古意增搖落泉聲不可聽宿禽驚夜語楊柳度
疎螢

山路鳴蛩亂僧鐘出暮城草堂閒榻在遙夜萼
籬岑

出東門赴馬師山湯餅之招道上羣山列

翠雲物競美稻花明麗紀興八首

曉出東門道
勤渠會友生
馬卿曾折簡
吹笛過青城

野岸分蒼水
天風漾翠楊
玉堂今獨往
遲日桂花黃

三隱松依石
五侯風出雲
山人應信息
留客有徵君

懷人欣節序
迥野稻花香
玉樹雲中長
相看柱史堂

傍竹雨三舸沿洄出綠疇沙明雙鷺浴雲度一
谿秋

暑塵蒼石少年事青峯多莫訝同衰鬢談玄入
薜蘿

行路山迎珮看松雲滿衣田翁頻喜雨相語坐
漁磯

短亭聊小憇苦茗供村翁我亦閒行者肩輿度
午風

喜雨十首簡江少峰郡丞

藏塢春無力隨車雨有神東臯初種麥吾亦部
中民

病渴思東海歡顏戀少峰一尊拚潦倒夢裏到
崆峒

鱗井低青漢龍宮疊暮雲清齋香一炷言拜紫
霄君

石齒高於戟溪聲入夜多呼童看不徹明發湧
晴波

拄杖聞流水南山薜荔情鳴鐘初遲客風雨隔

江城

漠漠遙天夕冥冥細雨來山人愛沾濕獨上妙
高臺

禪心慰閒寂寒色迴秋山窓外蕉分綠伊人獨
閉關

江漢曾憂旱歸舟思黯然心齋凝道骨憐爾力
回天

秋深猶午熟麥雨正當時海上分佳氣先春歌
兩岐

炎土消氛祲玄冥近雪霜使君春不淺隨處咏
甘棠

六言律

松滋編徭漫紀

予編徭凡數邑支溪淵澈隱峯峭竒皆可賞也至荊州松滋則曠然觀矣長江達海遠山爲疆三國必爭地也後三國爭者固多矣予以渺軀屏謫來遊旅懷集焉徭務稍閒誦劉禹錫松滋渡作有楚望秦灰之句分爲四韻次而歌之省愆勵業敢自委情尙思楚材益增愧作

吏務招呼里廛旅情縈絆簪組鷺飛別渚葭洲

犢臥高原薜戶營壘兩雄一鄉江山百戰千古

野夫去國逢辰誰謂辛酸痛楚

陸抗手祐於樂鄉城對壘相拒

古城夕鼓晨鐘過客山與水舫百里蒼茫野雲

三秋冥漠江漲千將若負楚遊傀儡漫酬巴唱

力役之征隱民金陵瑤闕相望

行在金陵微需不擾

離羣折蘭及暮抱病遊江之濱吏靜青霞款客

齋虛碧樹娛人談荊感慨陳迹弔屈淒其後塵

劍佩依依聖主邊烽載息咸秦

時平弔古懷賢人思自奮

倚樹銷憂騁日登觴獨酌秋臺行藏夢裏江國

意氣寰中楚材抱潔蟬鳴院柳凌虛鶴下庭苔
東西南北浮樵人代風塵劫灰

題畫

雙槎烟渚歸客三徑茅齋閉關谷曙鶯啼款款
溪流鷗渡閒閒松間白石漸長天外蒼雲獨還
談隱魂驚北關招遊書隔東山

六言絕句

廷杖伏枕月餘口占答親朋問訊五首

痛定支離病骨生餘展轉驚魂今雨不淹北袂

春風初動南轅

草色西橋綴碧雲
先上苑分春
抱病賓談款曲
移官人意沉淪

閉閣兒童問寢探
囊朋舊分書
我欲談玄玩世
誰應齊物逃虛

目盼芳蕙麗日
神遊蒼谷明霞
西海南山天仗
瓊宮隨處鶯花

百丈遙遙信息三
春種種頭毛藏
舟不嫌在壑
夢中空誦離騷

宿連窩三首

疎星迴野水白繁露清宵雲寒客中孤笛吹月
夢裏雙溪采蘭

楊柳舟舫繫纜柴扉砧杵連邨微風忽吹短袂
明月還照清尊

濟上秋深去國連窩夜泊思家青山何處堪隱
黃菊東籬正花

谿行四首

寒日輝輝綠籬曉烟冉冉丹楓對酒偶逢郡伯

寄書還憶山公

傅推官朝北上
寄問載宗道

一棹九迴枉渚三冬千古遐襟問水看山寺遠
尋僊覓佛緣深

幽草練谿雪淨高灘戟石雲迷險路雙舸鵲舉
閒情一榻烏栖

隨處崖懸楚峽夕陽渡倚蓬山江漢行藏夢寐
風塵歲月間關

山舍

山舍千林列幄野橋萬壑流金白雲拄杖同老

玄圃懷人獨吟

擬出門正月半漫臨水數峯寒古調奚囊欲解
野情馮鋏誰彈

季夏五日至七日雨不止即事成詠東顧

頤齋馬師山六言十絕

天漏道中沒馬陸沉簾外懸河下榻遲遲兩屐
年來更愼風波

爛熳朱英委地蕭疎高柳摧風三日人驚巨浸
愁懷欲寄絲桐

溪上乘船入市寒聲袞袞涼雲雷動小湖龍窟
沙翻西墅鷗羣

粟里歲華小隱鹿門生理躬耕苦雨祗添酒債
逢年更築詩城

烏雀悲棲灌木蛟龍怒鬪滄瀛鐘鼓西禪寂寞
滿天風雨關情

走石洪流旦旦摧墻白屋村村却飲不看翠竹
加餐還采芳蓀

風雨何心旱澇乾坤隨生成閉戶香清一榻

愧瘖集

八八卷

高

懷人夢醒三更

翦白已過十載幽棲二紀雞峯人報天漿潤物
石門百尺青松

望眼天門日馭雲間不受人呼莫問扶桑海色
江湖憂在潛夫

玉塘黃石芸閣白袍赤舄西洲我欲扁舟撫化
雙溪風日悠悠

同林西谷柯希齋遊古囊寺六言四絕

白石流泉齒齒蒼霞射日斑斑荔徑相看客散

虎谿獨伴僧還

伏虎石空露棘試蛟臺暝松蘿漫客雲山跡遠
禪門風雨聲多

鳥度天低海色泉流洞隱雲層杳杳人天鐘磬
栖栖佛日親朋

高田平田野綠遠水近水谿明海上群峯度雨
雲中雙樹鳴鶯

舟歷壽橋登祖叔厓州博士墳四首

碧渚頽霞野渡日華天籟臯蘭浮杯群從皆飲

倚棹鳬鷺共歡

新漲遙遙鷺浴芳林隱隱鴉栖梅雨寒輕陂上
麥風午霽洋西

環翠抱漁磯蘚層陰連鷺嶺雲勝日午橋掩映
紫霄蒼竹氤氲

洞石綠榛幻界化塵青鳥玄蹤萬事不驚躍冶
孤封猶訝屠龍